



Republika e Kosovës • Republika Kosovo • Republic of Kosovo  
Institucioni i Avokatit të Popullit • Institucija Ombudsmena • Ombudsperson Institution

---

## RAPORT

### I

## AVOKATIT TË POPULLIT

R. nr. 1409/2024

në lidhje me zvarritjen e procedurës gjyqësore në Dhomën e Posaçme të Gjykatës  
Supreme të Kosovës lidhur me lëndën C-III-12-0452

Drejtuar: Z. Sylejman Shumolli, gjyqtar mbikëqyrës  
Dhoma e Posaçme e Gjykatës Supreme të Kosovës

Prishtinë, më 10 qershor 2026

## Qëllimi i raportit

Raporti bazohet në ankesën e z. Isak Krasniqi (në tekstin e mëtejshëm: ankuesi) dhe mbështetet në faktet, provat dhe shkresat e lëndës të paraqitura prej tij, të cilat gjenden në dispozicion të Institucionit të Avokatit të Popullit, lidhur me zvarritjen e procedurës gjyqësore në lëndën C-III-12-0452. Ky raport ka për qëllim t'ia tërheqë vëmendjen Dhomës së Posaçme të Gjykatës Supreme të Kosovës (në vijim: DhPGjSK) për nevojën e ndërmarrjes së veprimeve për shqyrtimin dhe vendosjen e kësaj lënde pa vonesa të mëtutjeshme. Ndërmarrja e këtyre veprimeve është e domosdoshme, pasi e drejta për gjykim të drejtë, të paanshëm dhe brenda një afati të arsyeshëm garantohet me Kushtetutën e Republikës së Kosovës dhe Konventën Evropiane për të Drejtat e Njeriut.

Çdokush ka të drejtë që çështja e tij të shqyrtohet në mënyrë të drejtë, publike dhe brenda një afati të arsyeshëm nga një gjykatë kompetente. Siç ka theksuar vazhdimisht Gjykata Evropiane për të Drejtat e Njeriut (GjEDNJ), sistemi i drejtësisë nuk duhet të funksionojë me vonesa që çojnë në dobësimin e rolit të gjykatave dhe në cenimin e besimit të publikut në to. Përkundrazi, organizimi i sistemit gjyqësor duhet t'u sigurojë gjykatave të gjitha kushtet e nevojshme për shqyrtimin dhe vendosjen e rasteve brenda një afati të arsyeshëm.

## Baza ligjore

1. Sipas nenit 135, paragrafi 3, të Kushtetutës së Republikës së Kosovës: *“Avokati i Popullit ka të drejtë të bëjë rekomandime dhe të propozojë masa, nëse vëren shkelje të të drejtave dhe lirive të njeriut nga ana e organeve të administratës publike dhe organeve të tjera shtetërore.”*
2. Po ashtu, Ligji nr. 05/L-019 për Avokatin e Popullit, neni 16, paragrafi 8, përcakton: *“Avokati i Popullit mund të jep rekomandime të përgjithshme për funksionimin e sistemit gjyqësor. Avokati i Popullit nuk do të ndërhyjë në rastet dhe në procedura tjera ligjore që janë duke u zhvilluar para gjykatave, përveç rastit kur ka zvarritje të procedurave.”*

## Përmbledhje e fakteve

Faktet, provat dhe informatat që gjenden në dispozicion të Institucionit të Avokatit të Popullit (IAP) mund të përmbliidhen si në vijim:

3. Në bazë të informacioneve të ofruara nga ankuesi, rezulton se në DhPGjSK është duke u zhvilluar procedura gjyqësore lidhur me lëndën C-III-12-0452.
4. Sipas pohimeve të ankuesit, rezulton se ai dhe të tjerët<sup>1</sup>, më 21 prill 2006, nëpërmjet përfaqësuesit të autorizuar parashtruan padi në Gjykatën Komunale në Malishevë, e cila ka të bëjë me vërtetimin e pronësisë në ngastrat kadastrorë nr. 3/110, 3/16, 2/40, 2/23 dhe 3/148.
5. Pasi çështja kaloi në kompetencë të DhPGjSK-së, më 12 shkurt 2013 kjo gjykatë nxori Aktvendimin C-III-12-0452 për hedhje të padisë dhe kërkesës për urdhër paraprak gjyqësor.
6. Më 2 dhjetor 2021, Kolegji i Apelit nxori Aktvendimin AC-1-18-0091, me të cilin prishi Aktvendimin C-III-12-0452 dhe çështjen e ktheu në rigjykim.

---

<sup>1</sup> Z. Jakup Krasniqi, znj. Nuha Krasniqi dhe znj. Zejnije Krasniqi.

7. Institucioni i Avokatit të Popullit, më 18 dhjetor 2024, pranoi ankesë nga ankuesi dhe të tjerët, parashtruar kundër DhPGjSK-së, lidhur me zvarritjen e procedurës gjyqësore në lëndën C-III-12-0452.
8. Më 8 janar 2025, DhPGjSK-ja lëshoi urdhër dhe kërkoi nga paditësit plotësimin e padisë.
9. Më 27 janar dhe më 26 mars 2025, Avokati i Popullit i dërgoi shkresë gjyqarit mbikëqyrës në DhPGjSK dhe i kërkoi informata lidhur me çështjen e ankuesve.
10. Më 12 qershor 2025, ushtruesi i detyrës së gjyqarit mbikëqyrës në DhPGjSK iu përgjigj Avokatit të Popullit se, pas urdhrit të lëshuar më 8 janar 2025, u plotësuan kushtet për mbajtjen e seancës dëgjimore, e cila do të mbahet sipas radhës së arritjes në gjykatë.
11. Më 23 prill 2026, Avokati i Popullit i dërgoi shkresë gjyqarit mbikëqyrës në DhPGjSK dhe i kërkoi informata lidhur me çështjen e ankuesve.
12. Më 13 maj 2026, gjyqtari mbikëqyrës i DhPGjSK-së iu përgjigj Avokatit të Popullit se çështja e ankuesve do të shqyrtohet sipas radhës së arritjes në gjykatë.

### **Instrumentet ligjore të zbatueshme në Republikën e Kosovës**

13. Kushtetuta e Republikës së Kosovës, në nenin 21, përcakton: *“Republika e Kosovës mbron dhe garanton të drejtat e njeriut dhe liritë themelore [...]”*
14. E drejta për gjykim të drejtë dhe të paanshëm përcaktohet me nenin 31.1 të Kushtetutës: *“Çdo kujt i garantohet mbrojtje e barabartë e të drejtave në procedurë para gjykatave, organeve të tjera shtetërore dhe bartësve të kompetencave publike.”*
15. Po ashtu, mbrojtja gjyqësore e të drejtave, e përcaktuar me nenin 54 të Kushtetutës, parasheh: *“Çdo kush gëzon të drejtën e mbrojtjes gjyqësore në rast të shkeljes ose mohimit të ndonjë të drejte të garantuar me Kushtetutë ose më ligj, si dhe të drejtën në mjete efektive ligjore nëse konstatohet se një e drejtë e tillë është shkelur.”*
16. Konventa Evropiane për Mbrojtjen e të Drejtave dhe Lirive Themelore të Njeriut (KEDNj), sipas Kushtetutës së Republikës së Kosovës, është dokument ligjor drejtpërdrejt i zbatueshëm në Republikën e Kosovës dhe ka prioritet, në rast konflikti, ndaj dispozitave, ligjeve dhe akteve të tjera të institucioneve publike<sup>2</sup>. Ndërsa, paragrafi 1 i nenit 6 të KEDNj-së garanton: *“Në përcaktimin e të drejtave dhe detyrimeve civile, çdo njeri ka të drejtë për një proces të drejtë dhe të hapur brenda një afati të arsyeshëm kohor.”*
17. Ligji nr. 06/L-054 për Gjykatat, në nenin 7, paragrafi 2, përcakton: *“Çdo person ka qasje të barabartë në gjykata dhe askujt nuk i mohohet e drejta në gjykim të drejtë, në përputhje me procedurën e rregullt ligjore ose të drejtë në mbrojtje të barabartë me ligj. Çdo person fizik apo juridik ka të drejtë në gjykim të drejtë dhe brenda afatit të arsyeshëm kohor.”*
18. Ndërsa neni 7, paragrafi 5, i Ligjit për Gjykatat përcakton: *“Të gjitha gjykatat duhet të funksionojnë në mënyrë të shpejtë dhe efikase për të siguruar zgjidhjen e shpejtë të lëndëve.”*

<sup>2</sup> Kushtetuta e Republikës së Kosovës, neni 22.

## Analiza ligjore

19. Avokati i Popullit tërheq vëmendjen në nenin 53 të Kushtetutës së Republikës së Kosovës, sipas të cilit, të drejtat e njeriut dhe liritë themelore të garantuara me këtë Kushtetutë interpretohen në harmoni me vendimet gjyqësore të Gjykatës Evropiane për të Drejtat e Njeriut (GjEDNj).
20. GjEDNj-ja, në disa raste, ka theksuar se e drejta e palës që për çështjen e saj të vendoset në afat të arsyeshëm kohor paraqet element qenësor të së drejtës për gjykim të drejtë dhe të paanshëm, siç është e garantuar me nenin 6 të Konventës Evropiane për të Drejtat e Njeriut.
21. Avokati i Popullit gjen se praktika e GjEDNj-së ka vërtetuar se zgjatja e procedurës normalisht llogaritet nga koha e inicimit të procedurave gjyqësore (shih mes të tjerash Aktgjykimin *Moldovan dhe të tjerët kundër Rumanisë*, më 12 korrik 2005, dhe Aktgjykimin *Sienkiewicz kundër Polonisë*, më 30 shtator 2003) deri në kohën kur çështja ka përfunduar dhe/ose aktgjykimi është ekzekutuar (shih Aktgjykimin *Poitier kundër Francës*, më 8 nëntor 2005).
22. Avokati i Popullit, lidhur me mosinformimin e palës për fazën në të cilën gjendet lënda e vet, gjen se sipas vendimeve të GjEDNj-së, një prej faktorëve që duhet të merret në konsideratë është sjellja e autoriteteve kompetente gjyqësore dhe administrative dhe se është përgjegjësi e gjykatës që ta organizojë punën e saj në atë mënyrë që individët të informohen për përparimin dhe rezultatet mbi çështjet e tyre, brenda një kohë të arsyeshme (shih Aktgjykimin *Zimmerman dhe Steiner kundër Zvicrës*, 13 korrik 1983).
23. Sipas praktikës së gjykatës (shih *Poiss v. Austria*, § 50; *Bock v. Germany*, §35), llogaritja e kohës për trajtim të një rasti gjyqësor fillon nga momenti i paraqitjes së padisë në gjykatën kompetente, e që në rastin konkret fillon të llogaritet nga data 21 prill 2006, kur ankuesit parashtruan padi në Gjykatën Komunale në Malishevë, e deri në ditën e publikimit të këtij raporti.
24. Njëkohësisht, mungesa e mjeteve efektive për trajtimin e shkeljes të së drejtës për proces të rregullt brenda një kohe të arsyeshme, e drejtë kjo e garantuar me nenin 6 të Konventës Evropiane për të Drejtat e Njeriut, përbën shkelje të nenit 13 të Konventës [E drejta për zgjidhje efektive], i cili përcakton: “Çdo person, të cilit i kanë shkelur të drejtat dhe liritë e njohura me këtë Konventë, ka të drejtë të paraqesë një ankim efektiv përpara një instance kombëtare, edhe kur kjo shkelje ka qenë kryer nga persona që veprojnë brenda ushtrimit të funksioneve të tyre zyrtare.”
25. Më tej, neni 13 i KEDNj-së pasqyron në mënyrë të drejtpërdrejtë obligimin e shtetit që fillimisht t’i mbrojë të drejtat e njeriut përmes sistemit të tij ligjor, duke vendosur me këtë rast një garanci shtesë për një individ, që bën të mundur që ai/ajo t’i gëzojë të drejtat në mënyrë efektive. Nëse shikohet nga kjo perspektivë, e drejta e një individi për proces të rregullt brenda një kohe të arsyeshme do të jetë më pak efikase, nëse nuk ekziston mundësia që së pari ta parashtrorë këtë ankesë te një autoritet vendor. Kërkesat e nenit 13 mbështesin kërkesat e nenit 6 (shih Aktgjykimin *Kudla kundër Polonisë*). Kështu, neni 13 garanton një mjet ankimi efektiv te një autoritet vendor, për një shkelje të pohuar të kërkesave të nenit 6, për ta shqyrtuar një rast gjyqësor brenda një kohe të arsyeshme. Pasi rasti në fjalë ka të bëjë me ankesën lidhur me kohëzgjatjen e procedurës, neni 13 i Konventës është i zbatueshëm.

26. Për sa i përket zbatimit të nenit 13, Avokati i Popullit rikujton se GjEDNj-ja disa herë e ka theksuar se vonesat e mëdha në administrimin e drejtësisë, në rastet kur palët në procedurë nuk kanë mjete efektive për ankim në rastet e zvarritjes së procedurave gjyqësore, përbëjnë kërcënim për sundimin e ligjit brenda rendit ligjor vendor (shih Aktgjykimin në rastin *Bottazi kundër Italisë*, më 28 korrik 1999, dhe Aktgjykimin në rastin *Di Mauro kundër Italisë*, më 28 korrik 1999).
27. Lidhur me kërkesat e nenit 13, Avokati i Popullit rikujton se efekti i këtij neni është ekzistenca e një mjeti ligjor vendor që merret me substancën e “një ankese të kontestueshme” sipas Konventës dhe ta lejojë lehtësimin përkatës (shih p.sh. Aktgjykimin në rastin *Kaya kundër Turqisë*, më 19 shkurt 1998). Çfarëdo mjeti i tillë duhet të jetë efektiv si në praktikë, ashtu edhe në ligj (shih p.sh. Aktgjykimin në rastin *Ilhan kundër Turqisë*, më 27 qershor 2000).
28. Lidhur me ankesën për zvarritje të procedurës, Avokati i Popullit rikujton se “mjetet efektive” në kuptim të nenit 13 do të duhej të kishin qenë në gjendje ta parandalonin shkeljen e pohuar apo mosvazhdimin e saj, ose të ofronin përmirësimin adekuat për çfarëdo shkelje që tashmë kishte ndodhur (shih aktgjykimin e lartpërmendur *Kudla*).
29. Avokati i Popullit vëren se në sistemin tonë të brendshëm nuk ekziston një mekanizëm ligjor, përmes të cilit ankuesit do të kishin mundur të ankoheshin për zvarritje të procedurës për të arritur çfarëdo lehtësimi në formë të parandalimit apo të kompensimit.

#### **Konstatimet e Avokatit të Popullit**

30. Avokati i Popullit rikujton se, sipas praktikës gjyqësore të GjEDNj-së, kohëzgjatja e procedurës llogaritet nga koha e inicimit të procedurës gjyqësore, e që në rastin konkret është nga 21 prilli 2006, dhe konstaton se zvarritja e tillë, pa vendim përfundimtar, shkel:
- Të drejtën për gjykim të drejtë, proces të rregullt, brenda një afati të arsyeshëm kohor të përcaktuar dhe të mbrojtur me nenin 31 të Kushtetutës së Republikës së Kosovës dhe me nenin 6 të KEDNj-së;
  - Të drejtën për mjete efektive juridike, e mbrojtur me nenin 32 të Kushtetutës së Republikës së Kosovës dhe me nenin 13 të KEDNj-së;
  - Të drejtën për mbrojtje gjyqësore të të drejtave të përcaktuara në nenin 54 të Kushtetutës së Republikës së Kosovës.
31. Avokati i Popullit, duke pasur parasysh rrethanat e theksuara më sipër, në bazë të nenit 135, paragrafi 3, të Kushtetutës së Republikës së Kosovës dhe në bazë të nenit 16, paragrafi 8, të Ligjit nr. 05/L-019 për Avokatin e Popullit, si dhe bazuar në analizën ligjore të mësipërme, me qëllim të përmirësimit të punës në sistemin gjyqësor të Kosovës,

#### **REKOMANDON**

##### **Dhomës së Posaçme të Gjykatës Supreme të Kosovës:**

- Pa vonesa të mëtejme, t'i ndërmarrë të gjitha veprimet përkatëse për ta shqyrtuar dhe për të vendosur për lëndën C-III-12-0452.

Në pajtim me nenin 132, paragrafi 3, të Kushtetutës së Republikës së Kosovës (“Çdo organ,

*institucion ose autoritet tjetër, që ushtron pushtet legjitim në Republikën e Kosovës, është i detyruar t'u përgjigjet kërkesave të Avokatit të Popullit dhe t'i paraqesë atij/asaj të gjitha dokumentet dhe informacionet e kërkuara në pajtim me ligj.”) dhe me nenin 28 të Ligjit nr. 05/L-019 për Avokatin e Popullit (“Autoritetet, të cilave Avokati i Popullit u ka drejtuar rekomandim, kërkesë ose propozim për ndërmarrjen e veprimeve konkrete, [...] duhet të përgjigjen brenda afatit tridhjetë (30) ditor. Përgjigjja duhet të përmbajë arsyet me shkrim për veprimet e ndërmarra lidhur me çështjen në fjalë.”), ju lutemi mirësisht të na informoni për veprimet e ndërmarra lidhur me çështjen në fjalë.*

Me nderime,

Naim Qelaj

Avokat i Popullit

